

龍溪縣志

卷十九至
卷廿一

龍溪縣志卷之十九

仙釋

老氏浮屠異教也何以書書之仍舊志也秦始皇
遊海上求仙人羨門之屬史記載之漢明帝夢金
人及白馬馱經事後漢書載之然則一邑之乘必
立異乎哉志仙釋

隋潛翁開皇時人鍊形石壁山養白蝦蟆以自隨後不
知所終

唐康仙不知何許人乾符閒賣藥長安遇中丞黃礪自
稱圓山琵琶坂康長史及黃後過漳問圓山琵琶坂

乃無有康長史者入祠見像如長安所見因欲移其
祠於山上夜康見夢曰賣藥因循未得還却因耽酒
到人閒一心止戀琵琶坂無意更登山上山

宋吳本初母夢吞白龜而孕自幼不茹葷學道雲遊得
三五飛步之術誓以濟人救物爲念沒而有靈鄉人
構祠祀焉祠旁嘗有泉湧以洗病無不愈者乾道中

封慈濟真人

祠在青礁
今海澄地

劉希岳端拱中得道居西都老子觀一日陳席而臥須
臾見金蟬飛出遂失所在號口朗然子

邱元廸天慶觀道士也遍遊名山祥符閒於龍虎山得

道能驅鬼神賜號冲天大師

楊虔誠年十四棄俗入道能爲詩文自稱白衣道人於
天寶山夜坐見東北方有天燈雲旗之異遂自古谿
吳峯至天柱山止焉有蛇爲繞地因結茅其上鍊氣
閱形後不知所之

明董伯華不知何許人成化時往來漳泉間能呼風雨
立至嘗賣雷符一符一錢然必童子乃賣之藏符於
掌傍耳聞之應聲而震人稱雷師後不知所往

卓晚春字上洋不知何許人高何四尺蓬頭跣脚嫻書
畫與平和張徹善讀書芝山僧舍僧見其醜多侮之

一日郡守欲到寺上洋乃臥佛殿中忽然而斃蟲多如蟻臭穢難堪僧慌走白徹徹至呼曰郡守將至何當若此起而大笑時端午人競龍舟上洋見之歌曰樂兮樂兮樂極哀生人以爲狂俄而舟覆

國朝石向不知何許人里有黃佛者病啞忽一日遇路人語之曰有能治啞者盍從我求之佛隨之往至一處籬落宛然見道服脩髯人與之食食已令提香繞榻行香盡服藥一片如是者三佛疾遂瘳叩其姓名曰我石向也此地乃十八面山佛歸語其故翌日往求之絕無所覩問之治園者曰十八面山卽文圃此

其麓也無居人久矣時乾隆二年十一月九日事也
唐義中者三平開山和尚也故爲開元寺僧稚年出家
造懷暉後謁百丈仍往撫州見石鞏一見開弓云看
箭義中當前擘胸鞏收箭云三十年來張一弓掛二
箭而今只射半個聖人後南遊見大顛顛云卸却甲
冑來義中退步而立由是妙悟空中深了無碍寶歷
初於漳開元寺後卓菴會昌閒汰僧遂入三平山有
九層巖者山鬼所居義中卓錫衆鬼昇投之深潭及
還坐如故復以籠昇至瑞龍百丈滌沈之復如故由
是驚伏乞爲架院曰願慈悲閉目七日許之五日目

忽開院成山門未就鬼化形逸去有大魅身毛魃魃
義中戲擒住隨侍指使曰毛侍者乃聚衆居焉賜號
廣濟禪師咸通十三年十一月集門人曰吾生如泡
泡還如水三十二相皆是假偽爾等有不假偽底法
身與太虛等無生滅去來之相未嘗示爾臨行未免
老婆閉目長噓而化

楚熙不知何許人卓錫岐山刻竹引泉枯竹皆生笋因
名所居巖曰瑞竹巖

無隱師者住石獅山嘗聚徒講經有老虎跪而聽法時
或騎之以入市買肉飼之一日偶不下山虎餓甚師

乃伸一臂餽之後示寂山中今有虎磴遺蹟

芻然本州人年十三師事懷暉長入淨慧院一食三衣
徑行論學獨步貞元閒病四部經舊解淵渺觀教法
華楞嚴辨若建瓴嘗登壇說法有紅蓮變白異香飄
空之瑞重作戒壇七級廣輪高深尺度皆準以律法
雲遊每取水赫曦中飲道暍者所過林莽虎皆馴伏
禱雨所晴無不立驗及卒將葬停龕石上忽雷雨晦
冥沒入石中

桂琛乎妙法嗣也初漳州牧王公建地藏院延琛開法
大闡乎要其徒大法眼禪師欲出嶺謁琛琛語之曰

若論佛法一切現成眼大悟因隨琛歷覽叢林後爲
法眼宗

清豁居保福寺叅眺龍龍曰豁聞黎燒香說悟處答曰
香已拈了悟卽不悟龍說而喜之將入苧溪待滅遺
偈於橋曰世人休說路行難鳥道羊腸咫尺閒珍重
苧溪溪上水汝歸東海我歸山於湖頭石上端坐而
逝

朱懷璉陳氏子師事泐潭皇祐中召對化成殿問法稱
旨賜號大覺禪師所賜答詩頌凡十七篇至和中上
疏乞歸英宗詔許之賜龍鉢孟璉曰法以瓦鉢食食

此鉢非法對使焚之既渡江四明郡守盧席迎致爲
建閣藏所賜詩頌榜曰宸奎蘇軾爲作碑文欲見其
所賜詔書藏不出

本權性質直勇於道師事晦堂初黃山谷問晦堂曰此
中誰可與語晦堂曰漳州本權耳權方督役開田山
谷同晦堂往問曰直歲還知露柱生兒麼權曰是男
是女黃擬議未對權卽揮之上堂舉寒山偈曰吾心
似秋月碧潭清皎潔無物堪比倫教我如何說老僧
則不然吾心似燈籠點火內外紅有物堪比倫來朝
日出東

白衣僧從謙住開元寺嘗遊石壁山於亭際見二士對奕就之化鶴而去遺一棋子取吞之辟穀不食四十年歲百餘仍歸岐山示寂

無則初生時便合掌趺坐長從空巖遊有道行漳浦永豐埭屢築功弗成無則以杖畫水而堤址見砌基固築因名無則埭又建石橋通行旅名佛潭橋元至順二年示寂葬縣西北秋風山

明本源開元寺僧道譽流聞永樂十五年降勅徵之後

入京不知所之

本源初居南靖之龍嶺結茅名青龍庵今有卓錫泉

知海初名圓性自號閒寂和尚嘉靖閒習靜曹巖山中

夜坐常見白光蓮花不作聖解舍去遍訪禪林研心
經藏得聲聞之學十餘年乃歸住錫南山寺大演宗
風緇徒數百人常提萬法歸一一何歸以示參學未
有能契入者所題咏咸有理趣士大夫多敬禮之

古岸開元僧也明永樂閒入覲奉御藏真經南旋至龍
溪東郊雨花繽紛下人卽其地建瑞香亭預知死期
寂後葬秋風山桂琛塔旁

樵雲故開元寺苦行僧也萬歷初年萬松關未爲孔道
然行人以捷徑多出此樵雲結小菴日施茗山中夜
卽誦書數年諸經通曉神宗欲索天下名僧從苦行

得法者有司以樵雲應旋賜紫衣歸岐山依石結室
終焉

亘信南山寺僧憫寺宇頽墜於本山開堂聽法者千餘
人見諸僧衆分門立戶彼此交訐因一僧問如何是
宗門大旨曰去住原非我捧喝不是他一個雲門餅
好送趙州茶

三梅萬歷閒僧嘗以募資建萬壽巖渡海舟溺爲鱷魚
所吞三梅定性念佛不輟鱷卒吐出不死素嗜酒
每呼怪石爲友對之飲盡醉乃止一日提壺忽斷其
口曰緣止此矣遂不復飲將遺資置義塚卽今黯井

塚也

易經卷之四

物產

韓昌黎云閩越有山泉禽鳥之樂物產洵爲繁茂
矣龍溪山海礲鹵地粟帛之外無異物周禮所載
毛鱗羽介阜膏藪莢諸凡不具焉然江橘淮枳各
隨其地之宜海雀務盡乎物之變亦識小者
所不遺也志物產

穀之屬

稻有早稻有晚稻有大冬有寄種有青晚有早秔有晚
大冬秔龍溪之稻歲三熟早穀六月收晚穀十月收
二熟之穀較之一熟所獲亦相等但二熟之穀耐旱
故多種之又有一種曰埔稜種之旱地又有畚稻畚
人種之山然山有肥瘠率二三年一易其處非農家
所宜古今注曰稻之粘者爲秔閩中記曰閩人供釀

之餘歲時標粉為

黍

說文曰以大暑種故謂之黍其類有粘不粘如稻之
有梗糯不粘者為飯粘者亦名秫以為酒禮記云仲
夏之月農乃登黍擣
以為餽謂之餽餽

粟

爾雅糜赤苗芒白苗郭注曰糜赤梁粟芒白梁粟說
文曰粟嘉穀實粟之為言續也爾雅翼曰穀之最細
而圓者為粟古無粟名
以梁統粟非二物也

稷

閩書閩中種稷殊
少惟明祀用之

麥

有大麥有小麥有蕎麥
稗紅花白實三稜而黑

秋花冬實有穰麥
類麥而殼稍異

菽

豆之總名有黃豆綠豆
黑豆赤豆褐豆霍豆

扁豆九月豆御豆豌豆水豆菜豆樹豆葛豆
豆刀豆皂莢豆虎爪豆蛾眉豆蠶豆

麻

有黑白二種膏可壓油冠宗輿云即胡麻
種出大宛圖經云巨勝也龍溪種之者少

布帛之屬